


Wae hebbe we dao dan...



Wae hebbe we dao dan.....

Deze kiër Marcel Peeters oèt Bliërick.

Hae is sinds september 2009 lid van Rapido en verteld heej zien verhaol.

Ik woën in Bliërick en bin al 16 jaor getrouwd met Lillian.

Weej hebbe ôs beej badmintonclub United lière kinne wie ik 14 jaor ald waar.

Weej zoote auk allebei op de dansschoël, waat netuurlik un belangrièk trefpunt is in de puberteit.

Op dae laeftied beginse las te kriège van de hormone, daorum hebbe we toen un paar maond verkiëring gehad.

Op un gegave moment waar de leefde euver of baeter gezag;

we ware nog neet rièp veur ut serieuze werk.

Pas met de 20 zien we veur de ech begônne en un paar jaor later getrouwd.

Inmiddels zien we 16 jaor vaerder en hebbe un dochter Jill van 15 en zoon Stan van 12 jaor.

Sinds 1 januari werk ik as vestigingsdirecteur beej ein telecombedriëf in Eindhoven.

Weej hebbe veural met bedriëfstelefonie te doon en hebbe kóntakte in Nederland, België en Duitsland.

Ik zit al 12 jaor in ut telecomgebeure en dít is un nieje oëtdaging wao ik mien schouwers ônder kin zette.



Wie bis dich beej Rapido terech gekômme.

Al jaore had ik gen sport miër gedaon door tiëdgebrek.

Ik had ut drök in allerhande organisaties en bin in september 2010 gestop as voorzitter in de Pr. en Marketingkemie van de Wortelepin.

Taeves bin ik gestop as bestuurslid beej de Wortelepin.

Ik heb de letste 10 jaor auk allerhande programma's gepresenteerd en as letste ut leedjesmatinée .

Miene vrind Bart Vercoulen haet mich gestimuleerd um weer ens waat aan sport te gaon doon.

Bart haolde mich euver um ens beej Rapido unne dônderdaagaovend te gaon badmintonne want det vônd ik nog steeds un leuke sport.

Hae zei: Piet (miene beejnaam) det is un gezellige ôngedwônge club, probeer ut noow maar unne kiër.

Beejname gaeve is un typische hobby van de femielie Vercoulen.

Noow zien we 1½ jaor vaerder en ik heb d'r genne spiët van gehad.

De wuurs snel opgenaome in de groep en det veult plezeerig aan.

Door mien werk kin ik neet altiëd op dônderdaagaovend aanwezig zien maar det kin beej Rapido gelökkig zônder kwaoje gezichte.

De bis gelièk in ut iërste jaor bestuurslid gewaore, waat is dien doelstelling daobeej.

Pierre Vercoulen had mich in det iërste jaor al verschillende kiëre gevraog of un

bestuursfunctie niks veur mich waar

Ik woel eigelik efkes waat röstiger aan doen maar aafgeloupe september heb ik toch toegestump um mich veur te laote drage.

Ik heb met Rapido netuurlik neet zôn verleeje as de meiste andere in ut bestuur.

Waarschienlik kièk ik daodoor iets anders taege de club aan.

Det kin messchien van nut zien waat ideeje betref, maar as groentje in ut bestuur wil ik lever ièrs de kat oèt den baum kièke.

De leeje van ut ièrste oor zien intösse auk 50 jaor alder gewaore en bliève op de trainingsaovende langzaam weg. Dan môsse toch un oplossing zeuke um de trainingsaovende aantrekkelik te halde en um ut bestaon van de club te garandere.

Ik doot mien bes um dao same met de andere bestuursleeje euver nao te dinke.



Bis dich unne sportleefhebber en waat zien dien vaerdere hobby's.

Ik had zelf jaore neet mièr gesport maar ik bin waal unne sportleefhebber, veural unne voetbalfanaat.

Daorum gaon ik op zaoterdaag altièd met ôzze Stan mei as dae môt speule beej D1 van SVB. Jill speelt in ut 5e van United, dao gaon ik auk geregeld naor toe, dus in de wiekende hoove weej ôs neet te vervaele.

Vaerder heb ik verschillende hobby's die toch veural met vastelaovend te make hebbe.

Ik bin lid van Utopia: un vrindeclub van 8 man, ôntstaon as optochvereniging.

Weej hebbe prachtige pakke laote make in Duitsland en hebbe die met de optoch oèteraard altièd aan.

We vergadere elke 3e dônderdaag in de maond, nou ja vergadere.....ut is eigelik allemaol flauwe köl maar hièl gezellig.

Beej de Wortelepín bin ik met verschillende dinger gestop wie ik al verteld heb, maar achter de scherme blièf ik meidoon.

Un programma presentere heb ik altièd erg leuk gevônde, want de zaak aanein praote vônd ik gen probleem.

Ik presenteer al jaore Blariacum baeregood, maar met de samestelling van ut programma heb ik gen bemeujenis.

As lid van de Ald-Prinseclub kômme we eine kiér in de 3 maond beej elkaar.

Zoë kumpse nog ens örges en hilse leuke kóntakte.

Daobeej môt ik auk nog werke, maar op den tièd ôntspanning hebse nuedig.

Binnekort is ut weer vastelaovend, wie belaefts dich de vastelaovend

Ik bin van hoès oèt unne echte vastelaovendvierder, van jôngsaaf aan haet mich det getrokke.

Daorum bin ik auk al jaore lid van de Wortelepín.

Op allerhand gebied heb ik mien steinke beejgedrage en det blièf ik auk doon.

Lillian en ik vinde det we alle veurbals mei môtte make in Bliërick um alves in de stumming te kômme.

Met unne gezellige vrindegroep is det gaar neet vervaelend.

Daobeej is ut Gala elk jaor unne topper en asse zelf prins bis gewaes witse waat die "männer" veule die op det podium staon as prins en adjudante.



Netuurlik gaon we auk altièd met den optoch mei en hiël toevallig woëne weej in un straot wao den optoch doorkump.

Veur de femielie en kinnisse is ut waal plezeerig um drueg en werm naor den optoch te kinne kièke, dus is ut thoès good vol op vastelaoveszôndaag.

Wie probeer se det vastelaovesvirus euver te bringe op dien kinder.

De kinder hebbe det vastelaovesvirus al meigekrege beej de geboorte volges mich en ze bringe det auk in praktijk.

Jill is jaore beej de tanzmarietjes gewaes van de Wortelepín en Stan is beej SVB en op schoél al ens prins gewore.

Hae had d'r duudelik lol in, det zaet al genôg dink ik.

Bliefs dich die vastelaovesdaag in Bliërick of kumpse in Venlo de boèrebroèlof viere.

Weej bliève met vastelaovend en de waeke veur vastelaovend veural in Bliërick.

Maar op vastelaovesmaondaag gaon we nao 18.00 oor met un groepke naor Venlo en make d'r " in de stad" unne gezellige aovend van.

Gek hé, asse in Bliërick baodschappe geis doon zaesse; ik gaon naor ut dôrp.

Geisse naor Venlo dan zaesse; ik gaon naor de stad. Mak gen verschil ut is toch allemaol groët Venlo.

Efkes gans waat anders; geisse gaer op vakantie en welk land haet dien veurkeur.

In de zomervakantie gaon we meestal met de caravan op vakantie.

De hebs den tièd aan dichzelf en wilse örges langer bliève dan is det gauw genôg geregeld.

Zoë zien we met vrinde al in Italië, Spanje en Kroatië gewaes.

De kinder zien in dezelfde laeftieje, dus det geit prima ônderein.

Ik heb gen veurkeur maar waal unne wins.

Ik zoel gaer ens un aantal waeke naor Thailand wille, wae wet kôm ik nog ens zoè wiéd.

In ut veurjaor zeuke we ôs meestal un all inclusive hotel oét um te relaxe.

Dan zien d'r nog de diverse wiekendjes met ein of andere club, we hebbe gen klage waat vakanties betref.

Met wae zoelse gaer ens 24 oor door wille bringe en waarom.

Ik heb altièd vuël met meziek gedaon, det wilt zegge meziék gedreid veur michzelf en veur andere.

Met de 10 jaor had ik thoès mien eige drive-in show.

Kinder oèt de buurt mochte beej ós thoès plaetjes kômme luustere en op dae meziek danse.

Met de 15 bin ik op ut dôrp, in Arcen, as DJ begônne en heb in un zaelke achter de vruugere Oude Hoeve plaetjes gedreid.

Op dae laeftièd zal ik waal gezag hebbe: det is cool en det is kicke. Ik kièk d'r met plezeer op truuk.

Daonao heb ik in diverse disco's plaetjes gedreid o.a. beej Palladio in Helden en beej Vaat 69 in Venlo.

Zelfs in Lloret de Mar heb ik ens achter de dreitaofel gestaon veur de gein,nae ik hoofde gen Spaans te praote.

Sôms dreide ik auk plaetjes op un broelof op verzeuk en wie de stadsumroop in 1987/88

begô's heb ik mei radio-oëtzendinge gemak.

Ik zoel hiël gaer ens 24 oor op stap wille met Jeroen van Inkel of Adam Curry.

2 bekinde DJ's die op det gebied al waat jâörkes meidreie.

En dan bedoel ik de alderwetse meneer van radio make met cd'tjes dreie en de zaak aanein praote.

Det kóste veur mich waal ens ônvergaetelikke eurkes waere, weer unne wins dae nog in "ut vet" zit.



Hebs dich un laevesmotto en waat is det.

Mien laevesmotto is: **Alles kump good, maak dich gen zôrg.**

In ut zakelaeve liëse umgaon met taegeslaeg en auk met ut feit det de dinger zich sôms vanzelf oplosse.

Waat goof dich tot noow toe de grutste kick.

In 2007 bin ik prins gewore beej de Wortelepín, det makse maar eine kiër in dien laeve mei.

De 3 waeke veur vastelaovend ware ônvergaetelikke waeke same met de 2 adjudante.

Ôs vrouwe en de kinder hebbe die 3 waeke auk volop meigemak.

Weej zien in die periode beej allerhande instanties op bezoek gewaes en dan mósse dök veur de voès weg waat zegge, det lök meestal waal.

Wie we op bezoek ware beej B&W in Venlo (Börgemeister en wethalders) loog det iets anders.

Mien vader is miër op de huëgte van eur vakjargon en haet mich toen unne speech geschreve um un bietje op niveau oët den hook te kômme.

De waek veur vastelaovend is d'r un Prinsemis in de Antoniuskerk en dao môt de Prins netuurlik auk un wäördje zegge.

Weer haet mien vader de praek veur mich geschreve, det kin dae oët de EF.

De steis dao op de kansel veur un volle kerk dien verhaol aaf te staeke, ik kreeg d'r zelf kiepevel van en vônd ut erg emotioneel.

De receptiedaag as dreejspan waar zeker un hoëgtepunt.

De kries netuurlik neet alles mei maar asse later de foto's zuus belaeftse daen daag nog eine kiër.

Det zoëvuël minse dich un hand wille gaeve en met spontane reakties kômme, de veuls dich iërder unne keuning dan unne prins.

De hils d'r diverse nieje en leuke kóntakte aan euver.

Zoelse iets aan dichzelf wille verandere.

Ik kin slech naor hoès gaon as ik un äövendje op stap bin en môt altiëd mei sloéte.

Ein groët naodeil daovan is det ik mich dan 's-morges zelf taegekôm.

Unne mins kin waal ens flink schrikke van zien eige speegelbeeld !

De neems dich elke kiër veur um iërder te vertrekke maar; de wil is sterk maar ut vleis is zwaak.

Ut velt mich op det ik noëts allein bin met sloéte, d'r zien miër vrinde met die kwaol.

Messchien is det gaar gen slechte eigeschap maar neumse det: Paol halde.

Elly van Elswijk

As aafsloèting un stichtelik vastelaovesgedichje van
de Venlose Pastoër-Daeke Spee.

In Venlo is 't weer zoë wièd,
Ut is weer vastelaovestièd,
Verkleid door de binnestad flanere,
Neet nääle en neet lammentere,
Ein bietje jen, joeks en plezeer,
Ein glaeske fris, ein glaeske beer,
Ut laeve euver ut bölke aaie,
Och, det kin de mins neet schaaie,
Oèt d'n band ens efkes springe,
Leedjes euver de linte zinge,
Me blièf 't zegge en auk schriève,
De baog kin neet altièd gespanne bliève.

Geej, luuj in ut vastelaovesrièk van Sintermerte,
Neem ôg Jezus'wäörd ter herte;
God hilt van ôg. Hald auk van ein.
Det mak 't laeve waerdevol en fijn.
Zoë, mien stökske is noow aaf.
Deo gratias en.... **ALAAF!**

